



Le recit que Ioseph fit à ses freres de ses songes, fut cause d'une mortelle haine contre luy.

A P R E S infinis trauaux qu'auoit supporté Iacob , il arriua avec ses enfans en la cité d'Arbée en Hebron, où auoit conuersé son ayeul Abraham , & Isaac son pere : Auquel lieu demouroit lors Esaü, qui auoit si grande abondance de familles & troupeaux , que la terre ne les pouuoit porter. C'est ce qui donna occasion à Iacob pour nourrir paix, de se separer de ce lieu pour habiter en Sichem , où il mena ses douze fils , entre lesquels il aymoit fort le petit Ioseph âgé de seize ans, qui gardoit les troupeaux avec ses freres. Or Ioseph ayant songé vn songe , le recita à ses freres , disant ; l'ay songé que nous faisions des gerbes aux champs, & que ma gerbe s'esleuoit debout , & que vos gerbes à l'enuiron adoroient la mienne au milieu d'un champ. Adonc luy dirent ses freres , Seras-tu nostre Roy ? ou serons-nous tes sujets ? Derechef il songea , Que le Soleil , & la Lune & onze estoilles luy faisoient reuerence ; ce qu'il recita à son pere & à ses freres. Et son pere luy dit , Quel est ce songe ; Viendrons-nous moi, ta mere, & tes freres pour nous encliner deuant toy ? Lors ses freres luy porterent enuie & mauuaise volonté, & haine mortelle. Mais Iacob qui aymoit Ioseph , ruminait ces propos en son cœur.